

- 75 Sie sint filu redie      sih fianton zirretinne;  
     ni gidúrrun sies bigínnan:      sie éigun se ubaruúnnan.  
 Líut sih in nintfúarit,      thaz iro lánt ruarit,  
     ni sie bi iro gúati      in thíonon io zi noti;  
 Ioh ménnisgon álle,      ther sé iz ni unterfálle
- 80 (ih ueiz, iz gót uorahtha),      al éigun se iro forahtha.  
 Nist líut thaz es bigínne,      thaz uuidar in ringe:  
     in éigun sie iz firméinit,      mit unáfanon gizeínit.  
 Sie lértun se iz mit suuérton,      nálas mit then uuórton,  
     mit spéron filu uuásso:      bi thiú fórahten sie se nóh so.
- 85 Ni si thiót, thaz thes gidráhte,      in thiú iz mit in fehte,  
     thoh Médi iz sin ioh Pérsi,      núb in es thi uuírsi.  
 Lás ih in alauár      in einen búachon, ih ueiz uuár,  
     sie in síbbu ioh in áhtu      sin Alexándres slahtu,  
 Ther uuórolti so githréuuita,      mit suérta sia al gistréuuita
- 90 úntar sinen hánton      mit filu herten ánton;  
 Ioh fánd in theru rédinu,      tház fon Macedóniu  
     ther líut in gibárti      giscéidiner uuárti.  
 Nist untar in thaz thúlte,      thaz kúning iro uuálte,  
     in uuórolti nihéine,      ni si thie si zugun héime;
- 95 Odo in érdringe      ánder thes bigínne  
     in thihéinigemo thíete,      thaz ubar sie gibíete.  
 Thes éigun sie io núzzi      in snélli ioh in uuízzi:  
     ni intrátent sie nihéinan      unz se ínan eigun héilan.  
 Er ist gizál ubarál      io so édilthegan skál,
- 100 uuíser inti kúani:      thero éigun sie ío gínúagi.  
 Uuéttit er githíuto      mánagero líuto,  
     ioh zíuhit er se réine      selv so sine heime.  
 Ni sint thie imo ouh derien,      in thiú nan Fránkon uuerien,  
     thie snélli sine irbiten,      thaz sie nan umbirten.
- 105 Uuanta állaz thaz sies thénkent,      sie iz al mit góte uuirkent,  
     ni dúent sies uuíht in noti      ána sin girati.  
 Sie sint gótes uuorto      fízizig filu háрто,  
     tház sie thaz gilérnen,      thaz in thia búah zellen;  
 Tház sie thes bigínnen,      iz úzana gisingen,
- 110 ioh sie iz ouh irfúllen      mit mhílemo uuíllen.  
 Gidán ist es nu rédina,      thaz sie sint gúate thegana,  
     ouh góte thionontj álle      ioh uuísduames folle.  
 Nu uuíll ih scriban unser héil,      enangélioño deil,  
     so uuír nu híar bigúnnun,      in frénkisga zungun,
- 115 Thaz sie ni uuesen éino      thes selben ádeilo,  
     ni man in íro gizungi      Kristes lób sungi,  
 Ioh er ouh íro uuorto      gilóbot uuerde háрто,  
     ther sie zímo holeta,      zi gilóubon sinen ládota.  
 Ist ther in íro lante      iz álles uuio nintstánte,
- 120 in ánder gizungi      firméman iz ni kúnni:  
 Híar hor er ío zi gúate,      uuaz gót imo gibíete,  
     thaz uuír imo híar gisingun      in frénkisga zungun.